

四庫全書

子部

欽定四庫全書

金匱要畧論註卷二十一

漢張機撰

嘉興徐彬註

婦人產後病脉證

問曰新產婦人有三病一者病瘧二者病鬱冒三者大

便難何謂也師曰新產缺虛多汗出喜中風故令病瘧

亡血復缺多故令鬱冒亡津液胃燥故大便難

註曰產婦缺

襍病缺無定但從產上得之則以

三病

缺

言其病

缺

三因則一也一病瘥瘥者身

熱

缺

寒面赤卒口噤背反張也脉經曰瘥家其

缺

堅直上下二者病鬱胃鬱胃者抑鬱而昏胃

缺

三者大便難難者出之堅而非閉也人不同而病同故疑而問不知新產血虛血虛因多汗而邪乘虛入乃喜中風喜者易也風入于血虛之體無真氣以禦之則風爲主而瘥如枯木得風燥而翹矣亡血復汗則真氣既耗內寒自生故曰寒多寒留于陰陽兩虛

之體則陰火鬱而上冒若或蒙之矣血與汗皆津液所生血虛汗出津液既亡燥邪旋發燥則熱熱則乾乾則大便難于出矣

產婦鬱冒其脉微弱嘔不能食大便反堅但頭汗出所以然者血虛而厥厥而必冒冒家欲解必大汗出以血虛下厥孤陽上出故頭汗出所以產婦喜汗出者亡陰血虛陽氣獨盛故當汗出陰陽乃復大便堅嘔不能食

小柴胡湯主之

方見嘔吐中

註曰此下言新產之病雖三症病尚少唯鬱胃與大便堅每相兼而具且詳其病因與治法也謂產婦鬱胃虛多而邪少故其脉微弱中氣虛也中虛則陰火為逆而嘔且不能食然不能食似乎胃弱易泄而不知亡津胃燥故大便反堅內虛燥而身之陰陽不和故身無汗但頭汗出數證乃鬱胃中兼有之證也因復詳病因謂所以胃者何血虛則陰不能維陽而下厥厥者盡也寒也下寒則上鬱如胃胃家欲解必大

汗出見當聽其自汗非汗下所宜也其所以頭汗者何既血虛下厥則下之陰氣盡而陽為孤陽陽孤則上出而頭汗矣然既頭汗仍喜其汗出而解者何蓋陰不亡則血未大虛唯產婦之血至過多而亡陰則陽為孤陽自陰較之陽為獨盛所以喜其汗損陽而就陰則陰陽平故曰乃復然大便堅非熱多乃虛燥也嘔非寒乃膽氣逆也不能食非實邪乃胃有虛熱則不能食也故以柴胡參甘苓半夏和之

病解能食七八日更發熱者此為胃實大承氣湯主之

方見
症病

註曰此段言大虛之後有實證即當以實治故謂病解能食則經絡臟腑之氣俱平無產後本病可疑至七八日更發熱不惡寒又無表證可疑明是食復之象故曰胃實大承氣峻逐之恐因循致虛也屬詞比事新產鬱冒大虛之後藥不嫌峻如此况他病乎

產後腹中疴痛當歸生薑羊肉湯主之併治腹中寒疝

虛勞不足

方見
寒疝

註曰疔痛者緩緩痛也槩屬客寒相阻故以當歸通
血分之滯生薑行氣分之寒然胎前責實故當歸白
芍散內加茯苓澤瀉瀉其水濕此之產後大槩責虛
故君之以羊肉所謂形不足者補之以味也蓋羊肉補
氣疔痛屬氣弱故宜之此方攻補兼施故并治寒疝
虛損

產後腹痛煩滿不得卧枳實芍藥散主之

註曰痛槩由氣阻腹痛則脾虛氣弱而阻也脾虛而

正氣不斂則滿氣阻而壅火在上則煩壅極而陽明
逆不得從其道則不得卧故以枳實通氣所謂通則
不痛也芍藥補脾斂氣以消滿也氣順不痛則不煩
而卧矣然通氣斂血則氣血自調故又主癰膿以麥
粥下之和肝氣以養心脾也

枳實芍藥散方

枳實

燒令黑
勿太過

芍藥

等分

右二味杵為散服方寸七日三服并主癰膿以麥粥

下之

師曰產婦腹痛法當以枳實芍藥散假令不愈者此為腹中有餘血着臍下宜下瘀血湯主之亦主經水不利
註曰此言產婦腹痛果是脾虛氣阻枳實芍藥散祛
惡氣歛正氣決無不愈有不愈即不可責虛必是有瘀血
然產後之血不能瘀于上故曰臍下既有瘀血即當
專攻血不得復扭虛寒二字掣肘其藥力故直以大
黃桃仁蟅虫峻攻之謂病去即是補耳唯專去瘀血

故亦主經水不利既曰新血又曰如豚肝驟結之血也

下瘀血湯方

大黃

三兩

桃仁

二十枚

蟅蟲

二十枚

去足

右三味末之煉蜜和爲丸以酒一升煮取八合頓服之新血下如豚肝

產後七八日無太陽證少腹堅痛此惡露不盡不大便煩躁發熱切脉微實再倍發熱日晡時煩躁者不食食

則譫語至夜即愈宜大承氣主之熱在裏結在膀胱也
註曰此條言產後惡露不盡有血瘀而病實不在血
因腹內有熱致血結膀胱其辨尤在至夜即愈四字
謂產七八日則本虛稍可矣無太陽證則非頭痛發
熱惡寒之表證矣乃少腹堅痛非惡露不盡而何然
而不大便則為腸胃中燥熱煩躁發熱則為實熱上
攻脉微實則又非虛比更倍發熱日晡煩躁則為脾
胃鬱熱證更食則譫語胃熱尤確諸皆熱結腸胃之

證而非惡露不盡本證也况至夜即愈病果在陰則
宜夜重而夜反愈豈非實熱內結乎故以大承氣主
之意在通其熱結以承接其元氣則惡露自行不必
如前之單下瘀血恐單去血而熱不除則并血亦未
必能去也故復總言之曰熱在裏即傷寒論表裏之
裏謂當攻裏也曰結在膀胱是言血偶因熱而結非
血自結之病故不當攻血也

產後

該有中風

風續數十日不解頭微疼惡寒時時有熱

心下悶乾嘔汗出雖久陽旦證續在耳可與陽旦湯柳

枝加
黃芩

註曰此段言產後中風淹延不愈而表裏俱見者仍當去其風也謂中風之輕者數十日不解似乎不可責表然頭疼惡寒汗出時有熱皆表證也心下悶乾嘔太陽之邪欲內入而內不受也傷寒論有陽旦湯乃桂枝湯加黃芩以治太陽中風而挾熱者今久風而熱不已則陽旦證仍在陽旦湯何不可與而因循

以致誤也

產後中風發熱面正赤喘而頭痛竹葉湯主之

註曰中風發熱頭痛表邪也然面正赤此非小可淡紅所謂面若妝朱乃真陽上浮也加之喘氣高不下也明是產後大虛元陽不能自固而又襟以表邪自宜攻補兼施故以桂甘防葛桔梗薑棗清其在上之邪竹葉清其臆腑之熱而以參附培元氣返其欲脫之陽然以竹葉名湯要知本寒標熱臆居中

缺

缺

則標本俱安竹葉實為功

缺

缺

尤甚故加大附嘔則逆而有水故加

缺

竹葉湯方

竹葉一把 葛根三兩 防風一兩 桔根一兩

桂枝一兩 人參一兩 甘草一兩 附子一枚

大棗十五枚 生薑五兩

右十味以水一斗煮取二升半分溫三服溫覆使汗

出如頸項強用大附子一枚破之如豆大

該是入字

前藥

揚去沫嘔者加半夏半升洗

婦人乳中虛煩亂嘔逆安中益氣竹皮大丸主之

註曰乳者乳子之婦也肝氣原不足中虛者中氣大虛也脾土復困弱于是火上壅則煩氣上越則嘔煩而亂則煩之甚也嘔而逆則嘔之甚也病本全由中虛然而藥止用竹茹桂石膏白微者蓋中虛而至為嘔為煩則胆腑受邪煩嘔為主病故以竹茹之除煩止嘔者為君胸中陽氣不用故以桂甘扶陽而化

其逆氣者爲臣以石膏涼上焦氣分之虛熱爲佐以
白微去表間之浮熱爲使要知煩亂嘔逆而無腹痛
下利等證雖虛無寒可疑也妙在加桂于涼劑中尤
妙在生甘草獨多意謂散蘊蓄之邪復清陽之氣中
即自安氣即自益故無一補劑而反註其立湯之本
意曰安中益氣竹皮大九神哉喘加柏實柏每西向
得西方之氣最深故能益金潤肝木而寧心則肺不
受燥喘自平也如古謂肝家氣分藥蓋柏爲陰木能

益肝陰而輯其橫溢之氣潤肝之功多也有熱倍白
微葢微能去浮熱故小品以桂枝加龍骨牡蠣湯云
汗多熱浮者去桂加白微附子各三分名曰二加龍
骨湯則微之能去浮熱可知矣

竹皮大丸方

生竹茹 二分 石膏 二分 桂枝 一分 甘草 七分

白微 一分

右五味末之棗肉和丸彈子大以飲服一九日三夜

二服有熱倍白微煩喘者加拍實一分

產後下利虛極白頭翁加甘草阿膠湯主之

註曰仲景治熱利下重取白頭翁湯蓋白頭翁純苦能堅腎故為驅下焦風熱結氣君藥臣以黃連清心火也秦皮清肝熱也檉皮清腎熱也四味皆苦寒故熱利下重者宜之若產後下痢其濕熱應與人同而白頭翁湯在所宜矣假令虛極不可無補但非他味參朮所宜惡其壅而燥也亦非苓澤淡滲可治恐

傷液也唯甘草之甘涼清中卽所以補中阿膠之滋潤去風卽所以和血以此治病卽以此爲大補方知凡治痢者濕熱非苦寒不除故類聚四味之苦寒不爲過若和血安中只一味甘草及阿膠而有餘治痢好用參朮者故由未悉此理耳

白頭翁加甘草阿膠湯方

白頭翁 二兩
甘草 二兩
阿膠 二兩
秦皮 三兩

黃連 二兩
藥皮 三兩

右六味以水七升煮取二升半內膠令消盡分溫三服

附方

千金三物黃芩湯治婦人在草蓐自發露得風四肢苦煩熱頭痛者與小柴胡湯頭不痛但煩者此湯主之

黃芩一兩 苦參二兩 乾地黄四兩

右三味以水六升煮取二升溫服一升多吐下虫

註曰此言產婦有暫感微風或在半表裏或在下焦風濕合或生虫皆能見四肢煩熱證但以頭之痛不痛為別耳故謂在草蓐是未離產所也自發露得風是揭蓋衣被稍有不慎而暫感也產後陰虛四肢在亡血之後陽氣獨盛又得微風則苦煩熱然表多則上入而頭痛當以上焦為重故主小柴和解若從下受之而濕熱結于下則必生虫而頭不痛故以黃芩清熱為君苦參去風殺虫為臣而以地黃補其元陰

爲佐曰多吐下虫謂虫得苦參必不安其上出下出
政未可知也

千金內補當歸建中湯治婦人產後虛羸不足腹中
刺痛不止呼吸少氣或苦少腹中急摩痛引腰背不
能食飲產後一月日得服四五劑爲善令人強壯宜

當歸 四兩 桂枝 三兩 芍藥 六兩 生薑 三兩

甘草 二兩 大棗 十二枚

右六味以水一斗煮取三升分溫三服一日令盡若

大虛加飴糖六兩湯成內之于火上煖令飴消若去
血過多崩傷內衄不止加地黃六兩阿膠二兩合八
味湯成內阿膠若無當歸以芎藭代之若無生薑以
乾薑代之

註曰桂枝湯為中風家和榮衛調陰陽聖方加飴糖
為建中已為邪盛正虛者巧定一先本後標之法今
產後虛羸不足先因陰虛後并陽虛補陰則寒凝補
陽則氣壅後天以中氣為主故治法亦出於建中但

加當歸即偏於內故曰內補當歸建中湯謂腹中刺
痛不止血少也吸吸少氣陽弱也故將桂枝生薑當
歸之辛溫以行其榮衛之氣甘草白芍以養其脾陰
之血而以飴糖大棗峻補中氣則元氣自復而羸者
豐痛者止也然桂枝於陰陽內外無所不通尤當歸
善入陰治帶下之疾故又主少腹急摩痛引腰背不
能飲食者蓋帶下病去而中氣自強也曰產後一月
日得服四五劑為善謂急宜於此調之庶無後時之

歎然藥味和平可以治疾可以調補故又曰令人強壯宜若云大虛加飴糖而不用人參蓋人參補元氣與中氣不相安者有之飴糖乃補中氣而聽元氣之自生故因此一味而曰建中止爲產後先血虛人參偏於氣未免使陽驟勝則愈傷陰也若去血過多崩傷內衄方加乾地黃阿膠所傷偏於陰故特多加陰藥非產後必宜用地黃阿膠也

論曰近來腎氣丸十全大補湯俱用肉桂蓋襍溫煖

於滋陰藥中故無礙至桂枝湯因作傷寒首方又因有春夏禁用桂枝之說後人除有汗發熱惡寒一證他證即不用甚至春夏則更守禁不敢用矣不知古人用桂枝取其宣通氣血爲諸藥嚮導即腎氣丸古亦用枝其意不止於溫下也他如金匱論虛損十方而七方用桂枝胎前用桂枝湯安胎又桂苓湯去癥產後中風面赤桂枝附子並用產後乳子煩亂嘔逆用竹皮大丸內加桂枝治熱煩此於建中加當歸爲

內補然則桂枝豈非通用之藥若肉桂則性熱下達
非下焦虛寒者不可用而人反以爲通用宜其用之
而多誤矣予自究心金匱以後其用桂枝取效變幻
出奇不可方物聊一拈出以破時人之惑

金匱要畧論註卷二十一

欽定四庫全書

金匱要畧論註卷二十二

漢張機撰

嘉興徐彬註

婦人襍病脉證

婦人中風七八日續來寒熱發作有時經水適斷此爲
熱入血室其血必結故使如瘧狀發作有時小柴胡湯
主之

方見嘔吐中

註曰婦人熱入血室有四入血室必譫語此則不譫

語而但如瘧狀者謂傷寒男女皆有之而婦人有獨異者故首曰婦人中風即傷寒中所主桂枝湯之風證也七八日則表邪已解矣復有寒熱故曰續來然不長熱故曰有時間其經水則已來而適斷明是餘熱未盡乘虛入之則餘血必有結者故寒熱有時然非太陽傳入少陽之比因結血之熱致有此病故曰使如瘧狀雖非傳入少陽之比其藥仍用小柴胡者蓋血室之氣肝主之肝與膽為表裏膽因肝受邪

而病如瘡非他藥所宜故亦主和其半表裏謂上焦氣和而驟結之血將缺行若峻攻之如抵當湯證則亦犯少陽之禁也

婦人傷寒發熱經水適來晝日明了暮則譫語如見鬼狀者此為熱入血室治之無犯胃氣及上二焦必自愈
註曰此言熱入血室不必血結而初即搏邪為患者
曰傷寒即所謂無汗惡寒者也曰發熱此病之候也
曰經水適來來則經水初行之時也邪盛經氣亦盛

適相值寒邪必傷榮故邪與血搏血屬陰主夜故晝則熱雖發而明了暮則入陰分邪挾陰氣而爲譫語如見鬼狀者譫之甚也此爲熱入血室者言血室雖在內而表邪實未嘗犯胃及上二焦之內故曰此者只此而非表邪入裏也治法亦惟和表邪而畧兼清血室之熱足矣誤以爲客邪入內而攻之則所傷實多故曰無犯胃氣及上二焦必自愈必云者內原無病可攻故雖不治而必愈也

婦人中風發熱惡寒經水適來得七八日熱除脉遲身涼和胸脇滿如結胸狀譏語者此為熱入血室也當刺期門隨其實而取之

註曰此言經與病值不即為患而病解後反搏邪在胸脇作楚者謂中風病雖稍異于前之傷寒然發熱惡寒經水適來與前之邪盛經亦盛無二後七八日熱除脉遲身涼和是經在病中行而不礙也却七八日後反胸脇滿如結胸狀譏語是入血室之熱不竄

于經而結于肝之府故脉之所過處為滿甚則如結
胸狀陰火盛則讞語也然滿雖在胸脇非少陽表邪
雖如結胸非太陽表邪入裏雖讞語非胃實故曰此
熱入血室亦見不可誤攻胃及上二焦也當刺期門
期門者肝之分也此肝實之病瀉其實則愈故曰隨
其實而取之

陽明病下血讞語者此為熱入血室但頭汗出當刺期
門隨其實而瀉之滅然汗出者愈

註曰此言陽明病亦有熱入血室者但下血頭汗出不同耳陽明病即頭痛鼻乾不眠是也假如熱入陽明之腑則必有汗譫語等為可下之證何緣而動血乃下血譫語故知為熱入血室然陽明宜通身有汗此血中有熱而血耗耗則下虛搏邪身為燥陰所把故無汗惟頭則陰不能入而陽仍通故汗此病亦由肝實不常責陽明故亦刺期門而曰隨其實而瀉之澌然者通身微微似汗也汗則肝不强而陰陽平故

愈

論曰熱入血室仲景專就婦人言之以有血室而行
經婦人所獨也然男子兩腎間七節下亦有血海穴
假令平日血弱之人感風寒亦或能襲之凡見有陽
明證而變下血譫語中風已愈而如瘡傷寒初起而
夜如見鬼中風已愈而脇滿譫語不當以此意通之
乎

婦人咽中如有炙鬻半夏厚朴湯主之

註曰此條即後所謂寒傷經絡凝堅在上也灸臑臂
如乾肉也千金所謂咽中帖帖如有灸肉吐之不出
吞之不下狀如有灸臑數語甚明切此病不因腸胃
故不礙飲食二便不因表邪故無骨痛寒熱乃氣為
積寒所傷不與血和血中之氣溢而浮於咽中得水
濕之氣而凝結難移婦人血分受寒多積冷結氣最
易得此病而男子間有之藥用半夏厚朴湯乃二陳
湯去陳皮甘草加厚朴紫蘇生薑也半夏降逆氣厚

朴煎散結故主之薑苓宣至高之滯而下其濕蘇葉
味辛氣香色紫性溫能入陰和血而兼歸氣於血故
諸失血以赤小豆和丸服能使血不妄行夏天暑傷
心陰能下暑鬱而灸鬱者用之則氣與血和不復上
浮也

論曰余治王小乙咽中每噎塞嗽不出余以半夏厚
朴湯投之即愈後每復發細問之云夜中燈下每見
暈如團五色背脊內間痠其人又壯盛知下初因受

寒陰氣不足而肝反鬱熱甚則結寒微動扶腎氣上
衝咽喉塞噎也即于此方加大劑枸杞菊花丹皮肉
桂暈乃漸除而咽中亦愈故曰男子間有之信不誣
也

半夏厚朴湯方

半夏一升 厚朴三兩 茯苓四兩 生薑五兩

乾蘇葉二兩

右五味以水一斗煮取四升分溫四服日三夜一服

婦人藏燥悲傷欲哭象如神靈所作數欠伸甘麥大棗湯主之

註曰此條即後所謂或有憂慘悲傷多嗔也藏五臟也燥謂婦人血室先受積冷而鬱久爲熱則藏爲之燥靈樞曰一陰主闔關之闔折則肝氣絕而喜悲則知燥氣乘肝爲悲傷欲哭象如神靈所作病從血來故見陰象也靈樞曰胃病善伸數欠顏黑則知燥氣侵胃爲欠伸是使肝氣津潤君火不亢則藏陰不燥

何致乘肝侵胃令令悲傷欠仲其肝陰之熱可知心
肺之熱亦可知故以甘麥大棗湯主之謂小麥能和
肝陰之客熱而養心液且有消煩利溲止汗之功故
以爲君甘草瀉心火而救肺和胃故以爲臣大棗調
胃而利其上壅之燥故以爲佐蓋病本于血心爲血
主肝之子也心火瀉而上氣和則胃氣下達肝藏潤
肺氣調燥止而病自除也補肝氣者火爲土之母心
得所養則火能生土也

甘麥大棗湯方

甘草 三兩 小麥 一升 大棗 十枚

右三味以水六升煮取三升分溫三服亦補脾氣

婦人吐涎沫醫反下之心下即痞當先治其吐涎沫小

青龍湯主之涎沫止乃治痞瀉心湯主之

方俱見前

註曰此條即後所謂凝堅在上嘔吐涎唾也婦人下

焦素有積冷而凝于上之內為飲又得客寒故吐涎

沫是積寒為本而客邪為標也然邪高在肺宜從傷

寒心下有水氣者論治但彼無積寒故乾嘔此有疑寒故有涎沫耳醫者下之是胃未受邪而誅責無過故曰反藥傷其胃客氣動膈故心下即痞究竟下雖作痞而上之客寒水氣未服當先治其本故主小青龍則水氣與客寒俱去而涎沫止痞不過誤下之陰邪客于心下故以大黃芩連峻瀉心下痞鬱之邪可一服而愈也

婦人之病因虛積冷結氣為諸經水斷絕至有歷年血寒積結胞門 寒傷經絡凝堅在上嘔吐涎唾久成肺

癱形體損分

在中盤結繞臍寒疝或兩脇疼痛與藏

相連

或結熱中痛在關元脉數無瘡肌若魚鱗時着

男子非止女身

在下未

此字疑誤

多經候不勻令陰掣痛

少腹惡寒

或引腰脊下根氣衝氣衝急痛膝脛疼煩

悶奄忽眩冒狀如厥癩或有憂恹悲傷多嗔

此皆帶

下非有鬼神久則羸瘦脉虛多寒二十六病十變萬端

審脉陰陽虛實緊弦行其針藥治危得安其雖同病脉

名異源子當辨記勿謂不然

註曰此段叙婦人諸病之由所以異于男子全從經起舍此則與男子等也及其變為各病因稟之強弱時之虛實上下寒熱之偏勝而見證不同其治之或從標或從本即前後所述諸病可推此則言其大槩也婦人之病至胞門數句為一篇綱領因虛積冷結氣六字尤為綱中之綱謂人不虛則邪不能乘之因虛故偶感之冷不化而積氣熱則行冷則凝冷氣凝滯積則結結者不散也血遇冷氣而不行則經水斷

缺 有微甚上下不同故曰諸至有歷年血寒者 缺
冷則血寒也胞門即子宮所通陰中之門也為經水
孔道冷則瘀積則礙其月水之來矣 寒傷經絡至
損分數句為一段謂冷積關元始時尚微陽衰之後
榮衛相干結寒氣注經絡受傷相緣上入而凝堅在
上客邪并之嘔吐涎唾久則氣壅而上焦熱熱則肺
傷而癰初時止氣受寒結至此漸及形體故曰形體
損分此為病之變而在上者也 在中四句為一段

謂上焦之元氣或盛而無客邪并之則寒邪不能上
侵盤結在中膈主中焦故透膈寒疝寒疝寒痛也然
兩脇者肝所主肝之經爲厥陰起于下治于脇故每
與臧相連而痛者有之不必盡然或有也 或結熱
中至女身數旬爲一段謂人之稟賦不同中氣弱者
爲寒所侵而疝矣若其中氣素熱下邪并之即爲
熱中病而闋元之寒客熱不能消之故痛仍在然胃
熱故脉數不由榮分之熱故無瘡雖無瘡而客熱所

至榮氣作燥故肌若魚鱗魚鱗者肌粗不滑之狀也
時着男子非止女身謂冷氣收斂不能及人熱中則
氣熱男女交合感其熱而男子亦然非止女身肌粗
矣此上兩段言病之變而在中本爲寒或爲熱者也
在下四句爲一段謂關元已下寒冷或多則冷低
而經不全妨但期候不調勻冷近於陰故陰痛掣抽
痛也于是少腹陽氣少則惡寒矣此言病之變而在
下者也 或引腰脊四句爲一段謂病侵下之經絡則

骨節之間上下無定自腰脊氣衝膝脛無往不疼者
有之此言病之變于骨節者也 奄忽四句爲一段
謂邪入既深神氣受之則陰火熾而元首之陽衰爲
眩爲冒陽氣虧而神明無主爲厥爲癩藏氣既燥稍
或有憂慘相感則悲傷多嗔此言病之變于神氣間
者也 然厥癩悲傷似乎有鬼神者不知前此皆帶
脉已下爲病而非鬼神帶下者猶言帶之下非如今
人所謂白帶也其病之初發各因形體之寒熱爲寒

熱久則元氣耗而肌肉削故羸瘦久則經脉虛而陽氣少故多寒三十六病者十二癥九痛七害五傷三痼也詳首卷審脉陰陽虛實緊弦二句此總結全篇之治法謂變雖萬端總不出乎陰陽虛實而獨以緊弦為言者蓋經阻之始大槩屬寒故氣結則為弦寒甚則為緊耳示人以二脉為主而叅之兼脉也針藥者各有相宜也然病形雖同脉有各異所異之部即為病源故脉各異源此段為婦科辨證論治之最要

語故令辨記且戒之耳

問曰婦人年五十所病下利數十日不止暮即發熱少腹裏急腹滿手掌煩熱唇口乾燥何也師曰此病屬帶下何以故曾經半產瘀血在少腹不去何以知之其證唇口乾燥故知之當以溫經湯主之

註曰此段言歷年血寒積結胞門而甚焉者也故就婦人之年暮經水斷絕者而亦必擬證斷之以立法也謂婦人年五十其天癸已絕應不從經血起見矣

然而病證下利數十日不止知非偶感矣暮即發熱
病屬陰矣少腹裏急明乎病屬下焦矣因而腹滿是
雖脾病而根于下焦矣手掌煩熱掌屬心心主血
鬱則熱煩也唇口必得脾家榮氣而津潤榮氣鬱則
陰火從之故乾燥非渴也渴則一方恐亦是母因小
兒而病也大約雄黃取其去風殺虫肺為氣主壅濕
為熱故以葶蘆泄肺氣而拔其邪之源耳

金匱要畧論註卷二十二

欽定四庫全書

金匱要畧論註卷二十三

漢 張機 撰

嘉興徐彬 註

裸療方

退五臟虛熱四時加減柴胡飲子方

註曰此當與內經所謂凡傷於寒皆為熱病者對看
蓋傷寒邪自外來外來之邪為經絡間病為實邪故
此言五臟以別于表也曰虛熱以別于實邪也謂五

臟之間為虛邪所襲因而氣滯不暢則表裏之間虛邪作熱唯虛邪故四時皆有之唯虛邪不若表邪傳經之互異故但隨四時之氣補瀉所宜相為加減柴胡為表裏陰陽和解之劑且性能升少陽生生之氣故以為君白朮補中以養正氣故以為臣人身之中宣發則正氣流通壅滯則氣湧為熱故以桔梗開提上焦之氣陳皮利中焦之氣枳榔快腹中之氣為使生薑佐柴胡宣之于外佐枳榔散之于內名為退虛

熱不全任補亦不用寒劑謂此熱乃氣分壅熱非陰
虛發熱亦非外感表邪也然冬月多加柴胡此時少
陽之氣欲出于地故多加柴胡以助之則陽長陽長
則三陽自泰也至春勾萌漸發甲拆求申故加枳實
以轉動其機減白朮恐土燥則木不榮也夏月熱傷
元氣甘草功同人參故獨增此以佐白朮壯中氣但
長夏濕熱盛則氣滯藥亦如春而加甘草不減白朮
但加枳實生薑取宣補並行以助其發榮也若秋之

藥與冬同氣至此時漸收稍加陳皮以溫中快脾謂
秋冬收藏之令自不同於春夏耳

加減柴胡飲子方

柴胡 八分

白朮 八分

大腹枳榔

四枚并皮子用

陳皮

五分

生薑

五分

桔梗

七分

以上冬三月柴胡稍多

柴胡

陳皮

大腹枳榔

生薑

桔梗

枳實

以上春三月比冬減白朮增枳實

柴胡

白朮

大腹枳榔

陳皮

生薑

桔梗

枳實

甘草

以上夏三月比春多甘草仍用白朮

柴胡

白朮

大腹枳榔

陳皮

生薑

桔梗

以上秋三月同冬三月唯陳皮稍多

右各咬咀分爲三貼一貼以水三升煮取二升分溫

三服如人行四五里進一服如四體壅添甘草少許
每貼分作三小貼每小貼以水一升煮取七合溫服
再合滓為一服重煮都成四服

長服訶黎勒丸方

註曰訶黎性溫苦重酸輕有下氣消痰之功故合五
味五倍用則收瀋合橘皮厚朴用則下氣合人參用
則治嗽此云長服蓋黎勒之下氣苦中帶酸利而煎
澁故本草既謂破胸膈結氣通利津液又謂止洩痢

治久嗽所以能消腹中百病可長服也

訶黎勒

三兩

陳皮

三兩

厚朴

三兩

右三味末之煉蜜丸如梧子大酒飲服二十九加至
三十九

三物備急丸方

註曰此方妙在乾薑巴黃峻利寒熱俱行有乾薑以
守中則命蒂常存且以通神明而復正性故能治一
切中惡卒死耳

大黃 一兩

巴豆

一兩去皮心
熱外研如泥

乾薑

一兩

右藥各須精新先搗大黃乾薑為末研巴豆內中合
治一十杵用為散蜜和丸亦佳密器貯之莫令歇氣
主心腹諸卒暴百病若中惡客忤心腹脹滿卒痛如
錐刺氣急口噤停尸卒死者以煖水苦酒服大豆許
三四丸或不可下捧頭起灌令下咽須臾當差如未
差更與三丸當腹中鳴即吐下便差若口噤亦須折
齒灌之

治傷寒令愈不復紫石寒食散方

註曰熟玩此方可悟病後收攝餘邪調和陰陽之法
曰傷寒是病邪從外來有未盡清楚者也欲使愈而
不復發既無邪之可驅補之徒足動其氣故以諸石
藥之入陰而固本清熱者以和其陰以薑附桂枝之
入陽而運其本氣者以復其陽以防風搜伏風桔梗
開提肺氣以文蛤散結熱鬼臼除毒惡氣其間鐘乳
補肺餘糧益脾赤白石脂紫石英補心而養肺鎮浮

補養雖有不同其為和陰則一也乾薑壯中宮之陽
桂枝行上焦之陽附子復下焦之陽亦有不同其為
復陽則一也合枯萋有調劑之力合桔梗有開發之
妙于是陰陽平而氣血調病何從復哉然方名尚有
寒食二字方下無之恐是將寒食調服後或脫誤耳
未許候叅

紫石英

十分

白石英

十分

赤石脂

十分

鐘乳

煨十分

枯萋根

十分

防風

十分

桔梗

十分

文蛤

十分

鬼白各十

太乙餘糧燒十分

乾薑

附子炮去

桂枝

去皮各

右十味杵爲散酒服方寸七

救卒死方

薤搗汁灌鼻中

又方

雄雞冠割取血管吹內鼻中

猪脂如雞子大苦酒一升煮沸灌喉中

雞肝及血塗面上以灰圍四旁立起

大豆二七粒以雞子白并酒和盡以吞之

註曰凡人陽氣一分不盡則不歿故救卒歿唯以復其陽氣為主若鼻氣通于天天陽之所通也口氣通于地地陽之所通也面為諸陽之聚屬陽明中土人陽之所通也故或以薤或以雞冠血二物皆能通天分之陽故以灌鼻中猪脂能通膚中之陽苦酒為引雞子白能通腎中之陽大豆為引故以之灌喉雞屬

巽肝爲魂之主塗面則內通于胃以灰圍四旁則氣更束而內入相引入肝故肝氣通而愈

金匱要畧論註卷二十三

欽定四庫全書

金匱要畧論註卷二十四

漢 張機 撰

嘉興徐彬 註

禽獸魚蟲禁忌并治

凡飲食滋味以養于生食之有妨反能有害自非服藥
煉液焉能不飲食乎竊見時人不閑調攝疾疢競起若
不因食而生苟全其生須知切忌者矣所食之味有與
病相宜有與身為害若得宜則益體害則成疾以此致

危例皆難療凡煮藥飲汁以解毒者雖云救急不可熱飲諸毒病得熱更甚宜冷飲之

註曰凡氣遇熱則增遇冷則減毒氣亦然故曰諸毒病得熱更甚凡解毒藥必甘寒之品亦此故也若乾霍亂飲熱湯則死蓋毒由邪熱熾盛故得熱更甚每見猪屎及鹽水性寒皆能愈之亦所謂飲冷不獨湯之涼也不宜辛熱藥亦可知也

肝病禁辛心病禁酸脾病禁酸肺病禁苦腎病禁甘春

不食肝夏不食心秋不食肺冬不食腎四季不食脾辨
曰春不食肝者爲肝氣旺脾氣敗若食肝則又補肝脾
氣敗尤甚不可救又肝旺之時不可以死氣入肝恐復
魂也若非旺時卽虛以肝補之佳餘臟准此

註曰肝病禁辛五句恐助仇也春不食肝五句恐衰
臟偏絕也若死氣入肝之說甚有妙理蓋一臟當一
臟之旺時生氣之所起也以死肝合之則死氣借旺
而復是死氣乘肝伐生生之氣若非旺時縱有死氣

不乘旺無生氣相引則死氣不復也適足以補之而已故曰以肝補之佳

凡肝臟自不可輕噉自死者彌甚

凡心皆為神識所舍勿食之使人來生復其報對矣
凡肉及肝落地不着塵土者不可食之

猪肉落水浮者不可食

猪肉及魚若狗不食鳥不啄者不可食

猪肉不乾火炙不動見水自動者不可食之

肉中有如朱點者不可食之

六畜肉有切不斷者不可食之

父母及身本命肉食之令人神魂不安

食肥肉及熱羹不得飲冷水

諸五臟及魚投地塵土不污者不可食之

穢飯餒肉臭魚食之皆傷人

自死肉口閉者不可食之

六畜自死皆疫死則有毒不可食之

獸自死北首及伏地者食之殺人

食生肉飽飲乳變成白蟲

一作血虫

疫死牛肉食之令病洞下亦致堅積宜利藥下之

肺藏米甕中有毒及經夏食之發腎病

治自死六畜肉中毒方

黃蘗屑搗服方寸匕

治食醬肉食漏脯中毒方

醬肉密器蓋之隔宿者是也
漏脯茅屋漏下沾着者是也

燒犬屎酒服方寸匕每服人乳汁亦良 飲生韭汁

三升亦得

治黍米中藏乾脯食之中毒方

大豆濃煮汁飲數升卽解亦治狸肉漏脯等毒

治食生肉中毒方

掘地深三尺取其下土三升以水五升煮數沸澄清

汁飲一升卽愈

治食六畜鳥獸肝中毒方

水浸豆豉絞取汁服數升愈

馬脚無夜眼者不可食之

食酸馬肉不飲酒則殺人

酸當作駿出秦穆公岐下野人傳蓋馬肉無不酸者

馬肉不可熟食傷人心

馬鞍下肉食之殺人

白馬黑頭者不可食之

白馬青蹄者不可食之

馬肉純肉共食飽醉卧大忌

驢馬肉合猪肉食之成霍亂

馬肝及毛不可妄食中毒害人

治馬肝中毒未死方

雄鼠糞二七粒末之水和服日再服屎尖者是

又方

人垢取方寸七服之佳

治食馬肉中毒欲死方

香豉

二兩

杏仁

三兩

右二味蒸一食頃熟杵之服日再服

又方

煮蘆根飲之良

疫死牛或目赤或黃食之大忌

牛肉共猪肉食之必作寸白虫

青牛腸不可合犬肉食之

牛肺從三月至五月其中有虫如馬尾割去勿食食則
損人

牛羊猪肉皆不得以楮木桑木蒸炙食之令人腹内生

虫

噉蛇牛肉殺人何以知之噉蛇者毛髮向後順者是治噉蛇牛肉食之欲死方

飲人乳汁一升立愈

又方

以泔洗頭飲一升愈

牛肚細切以水一斗煮取一升煖飲之大汗出愈

治食牛肉中毒方

甘草煮汁飲之即解

羊肉具有宿熱者不可食

註曰宿熱者謂舊有熱病人也羊肉補氣得補而熱增故不可食

羊肉不可共生魚酪食之害人

羊蹄甲中有珠子白者名懸筋食之令人癩

白羊黑頭食其腦作腸癰

羊肝共生椒食之破人五臟

猪肉共羊肝和食之令心悶

猪肉以生胡荽同食爛人臍

猪脂不可合梅子食之

猪肉和葵食之少氣

鹿肉不可和蒲白作羹食之發惡瘡

麋脂及梅李子如妊婦食之令子青盲男子傷精

麋肉不可合蝦及缺梅李果食之皆病人

獾疾人不可食熊缺終身不愈

白犬自死不出古者食之害人

食狗鼠餘令人發

治食犬肉不消心下堅或腹脹口乾大渴心急發熱妄
語如狂或洞下方

杏仁

一升合皮熟研用

以沸湯三升和取汁分三服利下肉片大驗

婦人妊娠不可食兔肉山羊肉及鱉雞鴨令子無聲音
兔肉不可合白雞肉食之令人面發黃

兔肉着乾薑食之成霍亂

凡鳥自死口不閉翅不合者不可食之

諸禽肉肝青者食之殺人

雞有六翮四距者不可食之

烏雞白首者不可食之

雞不可共胡蒜食之滯氣

一云
雞子

山雞不可合鳥獸肉食之

雉肉久食之令人瘦

雞卵不可合鱉肉食之

婦人妊娠食雀肉令子淫亂無心

雀肉不可合李子食之

燕肉勿食入水為蛟龍所吞

鳥獸有中毒箭死者其肉有毒解之方

大豆煑汁及鹽汁服之解

魚頭正白如連珠至脊上食之殺人

魚頭中無腮者不可食之殺人

魚無腸胆者不可食之三年陰不起女子絕生

魚頭似有角者不可食之

魚目合者不可食之

六甲日勿食鱗甲之物

魚不可合雞肉食之

魚不得合鷓鴣肉食之

鯉魚鮓不可合小豆菘食之其子不可合猪肝食之害

人

鯉魚不可合犬肉食之。鯽魚不可合猴雉肉食之一云
不可合豬肝食

鯤魚合鹿肉食食令人筋甲縮

青魚鮮不可合胡荽及生葵并麥中食之

鱒鱔不可合白犬血食之

龜肉不可合酒菜子食之

蟹目凹陷者及厭下有王字形者不可食之 其肉不

得合雞鴨子食之

鮑鱉肉不可合菹菜食之

鰕無鬚及腹下通黑煮之反白者不可食之

食膾飲乳酪令人腹中生虫爲瘧

膾食之在心胸間不化吐復不出速下除之久成缺病
治之方

橘皮 一兩
大黃 二兩
朴硝 二兩

右三味以水一大升煮至小升頓服即消

食鱠多不消結爲癥病治之方

馬鞭草

右一味搗汁飲之 或以薑葉汁飲之一升亦消
又可服吐藥吐之

食魚後食毒兩種煩亂治之方

橘皮

濃煮汁服之即解

食鯀魚中毒方

蘆根

煮汁服之即解

蟹目相向足斑目赤者不可食之

食蟹中毒治之方

紫蘇

煮汁飲之三升 紫蘇搗汁飲之亦良

又方

冬瓜汁飲二升食冬瓜亦可

凡蟹未遇霜多毒其熟者乃可食之

蜘蛛落食中有毒勿食之

凡蜂蠅蟲蟻等集食上食之致瘻

果食菜穀禁忌并治

果子生食生瘡

果子落地經宿虫蟻食之者人大忌食之

生米停留多日有損處食之傷人

桃子多食令人熱仍不得入水浴令人病淋瀝熱毒杏

酪不熟傷人

梅多食壞人齒

李不可多食令人臃脹

林檎不可多食令人百脉弱

橘柚多食令人口爽不知五味

梨不可多食令人寒中金瘡產婦亦不宜食

櫻桃杏多食傷筋骨

安石榴不可多食損人腹

胡桃不可多食令人動痰飲

生棗多食令人熱渴氣脹寒熱羸瘦者彌不可食傷人
食諸果治之方

猪骨 燒過

右一味末之水服方寸匕 亦治馬肝漏脯等毒

木耳赤色及仰生者勿食

菌仰卷及赤色者不可食

食諸菌中毒悶亂欲死治之方

人糞汁飲一升 土漿飲二升 大豆黃汁飲之服

諸吐利藥並解

食楓桂菌而哭不止治之以前方

誤食野芋煩毒欲死治之以前方

其野芋根山東人名
野芋人種芋三年不

收亦成野
芋並殺人

蜀椒閉口者有毒誤食之戟人咽喉氣病欲絕或吐下
白沫身體痺冷急治之方

肉桂煎汁飲之多飲冷水一二升或食蒜飲

地漿或濃煖豉汁飲之並解

正月勿食生葱令人面生遊風

二月勿食蓼傷人腎

三月勿食小蒜傷人志性

四月八月勿食胡荽傷人神

五月勿食韭令人乏氣力

五月五日勿食一切生菜發百病

六月七月勿食菜萁傷神氣

八月九月勿食薑傷人神

十月勿食椒損人心傷心脉

十一月十二月勿食薤令人多涕唾

四季勿食生葵令人飲食不化發百病非但食中藥中皆不可用深宜慎

時病差未健食生菜手足必腫

夜食生菜不利人

十月勿食被霜生菜令人面無光目澁心痛腰疼或發心瘧瘧發時手足十指爪皆青困委

葱韭初生芽者食之傷人心氣

飲白酒食生韭令人增病

生葱不可共蜜食之殺人獨顆蒜彌忌

棗合生葱食之令人病

生葱和雄雞雉白犬肉食之令人七竅經年流血

食糖蜜後四日內食生葱韭令人心痛

夜食諸薑蒜葱等傷人心

蕪青根多食令人氣脹

雞不可共牛肉作羹食之成瘕病韭亦然

蓴多病

恐是食字

動痔疾

野苣不可同蜜食之作內痔

白苣不可共酪同食作蠱虫

黃瓜食之發熱病

葵心不可食傷人葉尤冷黃背赤莖者勿食之

胡荽久食之令人多忘

病人不可食胡荽及黃花菜

芋不可多食動病

妊婦食薑令子餘指

蓼多食發心痛

蓼和生魚食之令子奪氣陰欬疼痛

芥菜不可共兕肉食之成惡邪病

小蒜多食傷人心力

食躁或躁方

豉

濃煮汁飲之

鈎吻與芹菜相似誤食之殺人解之方

薺苳 八兩

右一味水六升煮取二升分溫二升

鈎吻生他旁無他草其莖有毛

以此別之

菜中有水葭若葉圓而光有毒誤食之令人狂亂如中風或吐血治之方

甘草

煮汁服之卽解

春秋二時龍帶精入芹菜中人偶食之爲病發時手背腹滿痛不可忍名蛟龍病治之方

硬糖二三升

右一味日兩度服吐出如蜥蜴三五枚瘥

食苦瓠中毒治之方

黎穰

煮汁數服之解

扁豆寒熱者不可食之

久食小豆令人枯燥

食大豆屑忌噉猪肉

大麥久食令人作癩

白黍米不可同飴蜜食亦不可合葵食之

菽麥麵多食之令人髮落

鹽多食傷人肺

食冷物水人齒

食熱物勿飲冷水

飲酒食生蒼耳令人心痛

夏月大醉汗流不得冷水洗着身及使扇即成病

飲酒大忌炙腹背令人腸結

醉後勿飽食發寒熱

飲酒食猪肉卧秫稻穰中則發黃

食飴多飲酒大忌

凡水及酒炤見人影動者不可飲之

醋合酪食之令人血瘕

食白米粥勿食生蒼耳成走症

食甜粥已食鹽即吐

犀角筋攪飲食沫出及澆地墳起者食之殺人

飲食中毒煩滿治之方

苦參

三兩

苦酒

升半

右二味煮三沸三上三下服之吐食出即差或以水

煮亦得 又犀角湯亦佳

貪食食多不消心腹堅滿痛治之方

鹽一升 水二升

右二味煮三沸亦分三服當吐食出便差

礬石生入腹破人心肝亦禁水

商陸以水服殺人

葶藶子傳頭瘡藥成

恐是或字

入腦殺人

水銀入人耳及六畜等皆死以金銀着耳邊水銀則吐


吐疑
是出

苦練無子者殺人

凡諸毒多是假毒以損元知時宜煮甘草薺芫汁飲之
通治諸毒藥

註曰此總結前諸毒之傷人謂一綫之毒何能傷人
乃假些微毒氣滲入元氣元氣反為毒氣作使至不
可療所謂星星之火勢極燎原亦惟以甘寒如甘草
薺芫培其本氣為主而兼與消解毒氣自無不愈故
為通治諸毒之藥見諸解毒藥不若此二味之精當

然亦可悟解毒之藥槩取甘涼矣



金匱要畧論註卷二十四